

Hari Minggu Kateketikal 2025

Tema: Kitai Ulih Ngaga Dunya Nyadi Endur ti Manah Agi (Pilipi. 2:4)

Tema Hari Minggu Katekis taun tu meri kitai tanya ti pemadu mar: Nama utai ti ulih digaga kitai nyadi orang Kristian ngambika dunya tu nyadi endur ti manah agi? Kitai mendingka jaku lalau Rasul Paul, "Anang semina berundingka diri empu aja, tang berunding mega ke orang bukai." (Pilipi. 2:4). Paul benung ngansak orang Kristian ba Pilipi rindu ke pangan diri. Ba ayat 4, iya ngemeratka nya kitai ti nyadi orang Kristian, kitai patut enda berunding ke diri empu sereta berundingka utai ti diguna orang bukai, ukai semina utai ti diguna diri empu aja. Reti nya, kitai sanggup bekunsi enggau orang bukai sereta ngintu orang bukai.

Perspektif Katolik ti deka ngaga dunya tu nyadi endur ti manah agi endang balat bendar beurat dalam ajar Tuhan kitai Jesus dalam Bup Kudus enggau dalam ajar Gerija, ti ngemeratka pemesai guna pengerindu, mela, sereta tanggung pengawa moral. Chara tu meransang siku-siku orang ngaul diri enggau chakah dalam komuniti sida sereta meransangka semangat pengasih sereta pengerentang. Ba pun ajar Katolik iya nya pesan ngambi "rinduka pangan diri" (John 13:34).

Katekisma Gerija Katolik ngemeratka pengerindu ngagai orang bukai enda ulih diseraraka ari pengerindu ngagai Allah Taala (KGK 1878). Orang Katolik dikangau ngangkatka pengerentang sosial, ti ngaul pengawa mutarka pun penatai penyeranta, enda sebaka, sereta ulah ti kasar. Gerija ngajar nya pengerentang ti bendar ngelui ari pengawa pengasih aja; iya begunaka ubah ti beriris, ngaul diri dalam proses politik, nyukung pengawa pengereja pengawa ti lurus, sereta ngarika atur ti nyaga rampa menua.

Siti agi sukut ti mesti diatur jampat dikena ngaga dunya tu nyadi endur ti manah agi iya nya pengawa ngintu rampa menua. Gerija ngelala pemerat moral dikena ngintu utai ti ditempat, baka ti dipadahka dalam ensiklikal Pope Francis "Laudato Si'." Dokumen tu minta pengawa begulai dikena mutarka pengerusak rampa menua sereta ubah gaya hari, ngansak raban Katolik ngemeranka pengawa ti meruan sereta ngarika atur ti nyaga dunya tu ungkup rebak dudi hari. Ulih ti meransang pengasai tanggung pengawa ngagai rampa menua.

Pelajar beguna amat dalam nempa siku-siku orang ti komited meri empas ti manah. Pelajar mesti berengkah ari rumah, lalu apai indai bejalaika tanggung pengawa ti pemadu beguna dikena ngajar anak sida ba umur sida ti agi biak. Nanam pemesai guna pengasih, integriti enggau servis ba anak mit sereta nembia dalam ruang bilik sereta mega dalam kelas kateketikal.

Institusyen sereta gerempung Katolik bejalaika tanggung pengawa ti beguna dikena nyikap ketua jema ila ti disikap dikena napi pamar rama. Chara pelajar ti nyeluruh tu beguna amat dikena meransang rebak ti ngemeratka pemaik begulai sereta nguji nempa dunya ti manah agi.

Dalam audiens besai iya di Vatican kena 30 hb Dua belas 2020, Pope Francis ngemeratka pemesai guna ngelala mensia ti dikunsi kitai sereta ngereja pengawa sereta terima kasih sereta pemanah ati nyadi chara ti enda tau enda digaga dikena

ngaga dunya tu nyadi endur ti manah agi. Iya meransang siku-siku orang meda pangan diri baka kaban belayan, ngangkatka pengasai kaul segulai lelaki enggau indu entara semua mensia.

Iya mega nerangka pengawa beterima kasih dalam ngiring pengidup Kristian ti tulin. Iya pechaya nyadi "orang ti terima kasih" ulih meri pangka ti besai dikena ngemanahka dunya. Ulih ti madahka terima kasih sereta beterima kasih, siku-siku orang ulih numbuhka rampa ti badas ti meransang pemanah ati enggau gerah jari.

Dalam ensiklikal iya "Fratelli Tutti," Pope Francis mantaika visyen pasal nyadi diri menyadi serata dunya, ti alai semua orang dikangau bekerejasamaka pemaik semua. Iya nyemetak madahka pengawa ngaga dunya ti manah agi begunaka pengawa begulai sereta komitmen ngagai pengerentang sosial, ngansak mensia mayuh ngambi bejalaika pengawa enggau bepengasih sereta nyadi penyukung orang ti dikelaungka.

Iya ngemeratka dalam rumah begulai semua kitai diau nyadi siti ruang bilik lalu merambu pengawa ti nyata dikena mulaika dunya. Iya bejaku pasal remang ti chelum ti benung ngelekai ba dunya kemaya hari tu. Jalai pengandal ti deka mai kitai pansut ari remang ti petang tu iya nya Pengerindu, Pengerentang, enggau Solidariti. Ketiga-tiga pemanah tu ditaburka ba serata Ensiklikal, ti meri kitai sekeda penemu pasal ajar sosial Gerija ti dikena ba situasyen ti nyata.

Dalam Taun Jubli Pengandal tu, Pope Francis ngangauka kitai nyadi pilgrim pengandal, lalu iya meransang semua orang milih pengerindu dalam dunya ti dituntung perang, pengawa ti enda lurus ba sosial, enggau mayuh macham pengawa kasar. "Kitai milih pengerindu, lalu pengerindu ngasuh ati kitai ransing sereta bisi pengandal. Ku iya, "Pengerindu ulih dipandangka ngena pemanah ati, "ti muka ati ngambika diterima sereta nulung kitai nyadi orang ti baruh ati agi." Ku iya nampung, pamaruh ati "ulih dikena berandau, nulung kitai mutarka salah penemu, sereta ngasilka terima kasih."

Enda ulih sangkal nya ti ngaga dunya tu nyadi endur ti manah agi tusah amat deka dijapai. Ba sekeda orang nya enda ulih dijapai. Jesus madah ngagai sida murid Iya; "Ba mensia, utai tu enda ulih, tang ba Allah Taala utai tu enda baka nya, laban ba Allah Taala semua utai ulih magang." (Mark 10:27). Jaku Jesus tu meri kitai pengandal ngereja pengawa ti enda ulih dikereja enti kitai bisi pengarap sereta manggaika pengandal kitai ba Iya. Jesus madah; "Laban, enggau bendar Aku madah ngagai kita, enti kita bisi pengarap ngemesai igi ensabi, kita ulih bejaku ngagai bukit tu, 'Mindah ari tu ngagai nyin!' lalu bukit nya deka mindah. Nadai utai enda ulih dikereja kita!." (Mat 17:20).

Tuhan nyamin kitai nya enggau Allah Taala semua utai ulih nyadi. Kitai ulih ngaga dunya tu nyadi endur ti manah agi ulih nimet Allah Taala. Kitai besembang ngambika Roh Kudus meransang semua orang Kristian nyadi ejen pemaik, pengerentang, sereta pengasih, ngubah dunya nyadi ayuk perintah Allah Taala.

Disediaka ulih

Fr. Boniface Kimsin